

22 NOVEMBER 2017

Sindiket edar pil khayal di pusat hiburan tumpas

Sindiket edar pil khayal di pusat hiburan tumpas

KLANG 21 Nov. - Satu sindiket pengedaran dadah yang memasarkan pil khayal di pusat-pusat hiburan sekitar daerah ini serta Lembah Klang sejak sebulan lalu tumpas dengan tertangkapnya dua lelaki dalam serbuan di dua buah rumah di Jalan Tepi Sungai, di sini Khamis lalu.

Kedua-dua lelaki tempatan berusia 31 dan 34 tahun itu ditahan di kediaman masing-masing yang dijadikan sebagai stor penyimpanan dadah.

Ketua Polis Daerah Klang Selatan, Asisten Komisioner Shamsul Amar Ramli berkata, pihaknya telah melakukan serbuan secara serentak di kedua-dua kedia-

man tersebut yang jaraknya hanya 100 meter kira-kira pukul 1.30 pagi pada 16 November lalu.

"Hasil serbuan menemukan 2,900 biji pil ecstasy seberat satu kilogram (kg) dan 27,000 biji pil erimin yang dianggarkan bernilai RM500,000. Selain itu, kita turut menyita sebuah Toyota Vios kepunyaan suspek dan wang tunai RM2,000.

"Siasatan awal mendapati, kedua-dua suspek ini baharu berjinak-jinak dengan sindiket tersebut sejak sebulan yang lalu dan menyasarkan pelanggan di pusat hiburan," katanya dalam sidang akhbar di sini hari ini.

Dalam pada itu, Shamsul Amar memberitahu, pihaknya kini sedang mengesan suspek utama yang dipercayai merupakan pembekal utama bagi sindiket tersebut.

"Hasil ujian air kencing terhadap kedua-dua suspek positif dadah dan mereka kini ditahan reman sehingga Khamis ini bagi membantu siasatan.

"Dengan serbuan ke atas stor penyimpanan ini membuktikan kita sentiasa komited memerangi jenayah tersebut dan akan memantau segala aktiviti demi menjamin kesejahteraan rakyat," ujarnya.